

東

華

續

錄

臣王先謙敬編

臣周潤蕃恭校

秋七月庚午諭軍機大臣等偶閱通鑑輯覽見魏司馬懿破襄平一事懿以公孫淵使其將率步騎數萬屯遼隧圍塹二十餘里乃欲以老師攻之正墮其計且賊大眾在此其巢穴空虛若直至襄平可期必破遂多張旗幟出其南牽綴敵勢潛濟師出其北直抵襄平遂大破之此乃兵家聲東擊西之法因思臺灣賊匪四處蔓延若紛紛堵禦處處勤殺則兵分勢單疲於應接轉恐不能得力若常青等於郡城外紮營處所派撥疑兵虛張聲勢佯與賊牽綴相持而該將軍統領精銳帶同侍衛章京將備或乘夜輕騎直趨南潭擒拏賊目莊大田使之猝不及備藍元枚亦派奮勉將備於

鹿仔港亦虛張聲勢堵禦附近一帶屯聚賊匪而該參贊率領弁兵會同大甲溪義民熟番前擣大里杙賊巢如此乘虛進剿出其不意使賊匪倉皇失措首尾不能相顧眾夥自必驚疑潰散是亦擣穴擒渠之一策兵家虛實互用古人屢有出奇制勝以少擊眾者原不可不隨機應變以防株守力疲也著常青藍元枚察看情形如可相機進取竟卽當照此辦理不可坐失事機以期迅速集事至漳泉一帶見今缺雨田禾黃萎小民秋收失望恐米價更有增昂甚關緊要前因閩省需用米石已早降旨令浙江等省備辦起運著徐嗣曾再詳晰出示俾各屬通行曉諭市價不至踊貴方爲安善○壬申命嗣後祭各神祠及各王派宗室大臣行禮雙忠祠昭忠祠派散秩大臣行禮著爲令○丁丑常青等奏據柴大紀稟稱賊攻踞鹽水港見發兵一千在彼處駐紮並於鹿仔草添駐

兵二百而駐縣之兵爲數益少又笨港汛聞賊已攻陷請速添兵應援臣等當派總兵魏大斌等帶兵千五百名赴鹽水港協力攻勦再鳳山之東港在鹿耳門左諸羅之笨港在鹿耳門右今俱被賊占擾則鹿耳門尤宜慎守臣等已援兵防禦至鹽水港距府城止五六十里賊眾圍攻鹽水港固意在諸羅而實覬視府城臣等緊營府城南未敢移動俟添調官兵到齊相機勦捕諭軍機大臣等鹽水港在諸羅之北皆爲運糧要路今俱有賊匪搶占以絕糧餉諸羅勢甚迫急所關甚重看來賊人狡計竟係因大兵俱在府城諸羅一路兵勢單弱故作窺伺府城以牽綴官兵使常青等不能遠離該處營盤而其意實欲斷我糧道攻逼諸羅縣城若諸羅有失則臺灣府城勢更孤懸四面受敵大有闢繫前曾有旨令常青等或舍南趨北直擣大里杙賊巢或竟往南潭擒拏賊目莊大

田今看此情形該將軍等不必向南竟宜先往北路常青此時或於總兵副將內擇其奮勇可恃者酌撥一員令其固守營盤而常青等竟揀選精銳親自帶領同侍衛章京將備等數人直趨北路前至諸羅會同柴大紀併力擒渠擄穴或再分派勁旅將鹽水港屯占賊匪悉力殲除打通糧道此爲上策藍元枚昨已有旨令卽帶兵前往鹽水港勦殺賊匪後自南而北星赴諸羅接應柴大紀或能先將笨港一帶屯踞賊匪乘勢埽除更爲妥善柴大紀處得此兩路兵力接應鹽水港笨港道路肅清米糧通運南北聲勢連絡人心自定似於進剿機宜極爲得力著常青藍元枚酌量情形迅速籌斷不可坐失事機再用兵之道全在先聲奪人見在添調兵丁不爲不多卽日陸續前抵臺灣常青等不妨再行曉諭軍民以此次添調官兵之外見又有旨於廣東及福建本省添調兵數

萬接續前進俾軍民等心膽益壯兵氣益爲振作且使賊人聞之亦不敢肆意驕張此亦先聲後實之一法仍著李侍堯孫士毅廣爲召募數萬多多益善以備調遣再臺灣府城官兵糧餉火藥等項存貯甚多常青於帶兵前往鹽水港等處進剿時除將戰守官兵應用糧餉火藥隨身攜帶外所餘糧餉火藥若仍貯積府城該處係編竹爲城恐易生賊人窺伺之心不可不慮莫若悉行攜帶隨行即使府城萬一稍有不虞亦止係空城賊人一無所獲亦不能久占並著該將軍酌籌妥辦但此時該將軍等須密之又密止可暗爲派撥不得稍露風聲使軍民聞之心中搖動轉多不便至鳳山之東港爲賊占踞於鹿耳門甚有關繫見已據常青派撥官兵前往防禦但恐該處官兵未能分身尙不能殲除淨盡著李侍堯於內地總兵副將內奮勇者揀派一員帶兵一二千前往剿除

占踞東港賊匪打通糧路更可得力○諭據常青等奏稱此次征勦臺灣逆匪柴大紀蔡攀龍臨陣打仗實屬奮勉超眾等語柴大紀蔡攀龍在陣打仗如此超眾向前奮勉實屬可嘉著加恩賞給柴大紀壯健巴圖魯名號蔡攀龍強勝巴圖魯名號仍照巴圖魯例由彼處各賞銀一百兩以示獎勵○戊寅諭福建陸路提督署臺灣鎮總兵柴大紀自勦捕逆匪以來督率官兵義民奮勇殺賊一切調度深合機宜著授爲參贊協同將軍常青等悉心籌辦以期迅奏膚功○癸未諭軍機大臣等昨圖薩布呈進貢物內有鑲金嵌珠等物殊屬無謂已將各件全行駁回矣從前遇有督撫呈進貢物內鑲嵌金珠各件屢經降旨飭諭不准再行進獻今圖薩布又復以此呈進豈任土作貢之道況此等金珠物件尤非古雅玩器尙可供陳設之用實覺鄙俗可厭圖薩布何以侈靡相尙若

此著傳旨申飭嗣後該撫毋得再以此等無用之物進獻將此諭令知之○乙酉諭軍機大臣等據常青恆瑞奏加派官兵應援諸羅一摺所辦著著皆錯瑚圖里等前因鳳山失事被賊攔截在山猪毛駐守數月該將軍等因中閒道路阻隔無從知彼處信息以致日久並未遣兵救援今瑚圖里既從山猪毛小路翻山進攻南潭聲勢可得聯絡該將軍等一得稟報卽應親統大兵直往南潭一帶合力夾攻賊目莊大田可期就獲南路即可乘勢肅清乃常青等計不出此僅派那穆素里烏什哈達等帶兵五百名接應於事何益且官兵前在山猪毛被困數月旣全藉廣東莊義民助糧接應此次瑚圖里等回至大營其廣東義民自應令其留守本莊自爲捍衛乃竟帶同來至大營令其隨營征勦該義民等旣聚戀室家心懸兩地不能得力且使賊匪聞知該義民等隨營助勦必

心懷忿恨將其村莊焚毀家屬殺戮義民轉致受累灰心且常青等統兵往北路進剿到處俱有義民協助若見廣東莊義民投營出力轉致家屬房產被賊摧殘不能招徠鼓舞轉使義民等望而生畏豈非驅之從賊所關匪細觀之實生憤懣著常青等卽傳旨將見在山猪毛義民俱令速回本莊自行守護家屬田產或仍令瑚圖里親自帶領義民等回至山猪毛酌量添兵護送以安其心而資守禦至柴大紀見在諸羅被賊匪糾合夥黨攻踞鹽水港四處斷絕糧道又請添兵救援常青等卽應領將備親身速統大兵前往接應乃僅派魏大斌等帶兵一千五百名已不足以資勦殺而魏大斌又不曉事復留兵五百名防守鹽水港止帶兵千名前往諸羅以致兵力益單遇賊擁至不能抵敵勦殺收回鹿仔草營盤仍不能前抵諸羅且官兵義民多有受傷陣亡者及魏大斌請

援常青等又止派遊擊田藍玉帶兵一千名赴鹿仔草應援似此零星派撥何濟於事而伊等在府城又何曾殺戮多賊能進尺寸之地哉且常青等見魏大斌請援卽撥兵一千前往接應若他處復有求救者又撥兵援應似此各處派撥分投堵禦則大營卽有多兵亦必所存無幾豈又將屢請添兵而不已耶常青恆瑞何漫無布置辦理錯謬若此俱著嚴行申飭看來該將軍等此時竟茫無主見一錯百錯於勦捕機宜竟不能得有把握增朕南顧之憂爲今之計該將軍等惟有遵照節次所降諭旨直赴諸羅藍元枚亦應自北而南與常青柴大紀會合一處全力搜捕該將軍等勿再株守坐待以致老師糜餉坐失事機自取重戾○丁亥以明興署山西巡撫○王辰以海蘭察爲參贊大臣舒亮普爾普爲領隊大臣率侍衛章京等赴臺灣勦賊

八月丁酉諭臺灣逆匪林爽文等於光天化日之下膽敢糾眾不法劫縣戕官前特派總督常青前往臺灣授爲將軍督辦勦捕事宜數月以來該將軍督率調度尙無過失但統領多兵駐守府城營盤雖屢有斬獲並未能痛加殲戮那移尺寸之地相機進剿是常青雖屬無過亦不得爲有功且該將軍年逾七旬究恐精神不能周到茲特命福康安前來行在面授機宜令其攜帶欽差關防馳赴臺灣更換常青督辦軍務卽授福康安爲將軍並授海蘭察爲參贊大臣普爾普舒亮爲領隊大臣其恆瑞藍元枚柴大紀仍著照前參贊軍務並揀派曾經戰陣之巴圖魯侍衛章京一百餘人分起前往領兵征剿至臺灣初次調撥及續調官兵已有數萬嗣又於廣東浙江添調綠營及駐防兵萬餘名並於福建本省派撥兵六千見又添派四川屯練降番並於湖北湖南等省挑備兵

數萬陸續過程前往合計徵調各兵不下十餘萬福康安到臺灣後察看情形如以兵力多多益善再應添兵若干卽一面檄調一面奏聞所有應用軍糈已於浙江江南江西湖廣四川等省撥運米百餘萬石軍營火藥等項亦已廣爲儲備著李侍堯通盤覈算妥爲經理俾足敷十餘萬官兵之用毋致稍有短缺似此大兵雲集加以派出帶兵之巴圖魯侍衛章京等皆係屢經行陣一以當千是百餘人已足當萬餘人之敵諒此以膺小醜一時烏合何難立見殲除指日授首至常青勦捕賊匪雖未能歲功奏績念伊究係年老尙無貽誤著於福康安到臺灣後卽行來京陞見再赴湖廣總督之任○戊戌諭軍機大臣等據塔琦等奏稱燕起糾合布魯特數百人到色呼庫勒地方搶去牲畜人口無數由喀喇烏蘇逃走一面派侍衛官兵追捕一面行知明亮截拏等語逃犯燕起

在外窮迫膽敢糾合布嚕特多人搶擄色呼庫勒部落實屬可惡  
著派老格卽帶索倫兵並勇健布嚕特回人追拏務獲塔琦明亮  
仍曉諭各處卡座小心防範如敢再來搶擄務必竭力截拏痛加  
勦殺○己亥諭太常寺堂官參奏劉墉遣祭 文廟未行一揖禮  
一揖從前朕爲皇子時曾經致祭 文廟記所行儀注仍有此一  
揖自係相沿未經改定劉墉於祭祀時以一揖之禮不可行未經  
照例行禮該堂官固應據實參奏但此一揖之禮俱在上香獻爵  
飲福受胙之後本係小節俗禮劉墉未經遵行尙非大過姑免交  
部但劉墉之意既以爲斷不可行自應奏明更改乃並未陳奏而  
於向用儀注率任臆改此則非是至相沿一揖之禮本不可行嗣  
後著於儀注內改正以昭誠敬○庚子諭軍機大臣等南潭賊匪  
經官兵奮勇勦殺莊大田已有潛逃之信是賊勢業經潰散

勦捕事務大有轉機該將軍等乘此賊人潰散兵威振作之時亟應親統大兵奮力追殺若於福康安未到以前將林爽文莊大田等即時擒獲則克復全臺俱係常青之功受朕恩眷豈復可量至莊大田潰敗潛逃其勢自已窮蹙見在北路一帶鹿仔港有藍元枚在彼領兵堵截而諸羅接應之兵已經三路會合莊大田逃往北路自無他處可以竊踞必逃至大里杙以爲負嵎苟延之計若賊首賊目同聚一處正可聚而殲戮即使負嵎死守以大兵全力四面合圍賊人貲糧有盡無所得食自當束手就斃該將軍不可不益加勉力深入長驅速行奏績但仍當酌派弁兵嚴防後路勿使餘匪得以乘隙潛出此爲最要至魏大斌前經常青派令帶兵接應諸羅在鹿仔草被賊擋截小有阻滯該鎮能督率官兵透出重圍前抵諸羅與柴大紀會合亦屬奮勉出力著賞戴花翎其田

藍玉特克什布張萬魁同往接應能與魏大斌奮力勦殺直抵諸羅亦尙奮勇著常青查明何人最爲出力卽於前次發去花翎酌量賞給戴用以示鼓勵至李侍堯辦理軍務調度接應俱爲妥協周到此次一得常青處殺散南路賊匪及柴大紀援兵會合信息卽行馳奏以慰朕懷亦著賞蟒袍一件大小荷包各一對以示獎勵其常青俟奏報到日再行賞給○甲辰諭軍機大臣等前因豫省睢州有漫口之事偶憶及上年阿桂會同李世傑等開挖二套引河分洩清水見在洪澤湖水勢盛漲若再將二套引河挑挖深通走成熟路將來豫省合龍清黃會合竟可從二套引河下注歸海並於三套地方築建擋黃堵偪溜全趨引河曾將圖內用硃筆標誌命李世傑李奉翰二人查勘辦理原因伊等繪進原圖內二套引河形勢寬展竟似正河三分之一一經展寬足資容納是以

諭令酌量再加開挖爲先事豫籌之一法今據李世傑等奏正河見在歸海之路已屬寬深暢達二套內外似可無須大辦並稱正河內若築作攔黃壩則歸海之路不暢上游必致壅遏等語此奏自係實在情形但披閱新圖內二套引河甚爲窄小原挑口寬僅止二十丈至十餘丈不等而正河當大汛盛長時水面寬至一千三百餘丈似此情形與原圖迥不相符若原圖所繪二套引河僅寬一二十丈焉有將大河一千餘丈正溜偏令全趨入海之理且正河歸海之路既屬寬深去歲又何須另開二套引河糜費帑金徒勞無用看來伊等從前竟係因阿桂會辦之事心存迴護及朕降旨令伊等親往查勘親見實不可行又不肯據實奏明藉詞支飾而前此硃筆標誌原圖並未隨摺繳還可見伊等亦自知原圖尙多迴護未爲確實恐兩相比較其僞立見朕豈能爲所欺乎所

有挑空二套引河及築作擋黃壩之處俱著毋庸辦理將此傳諭  
李世傑等並諭阿桂知之尋李世傑等奏臣等原估挑空引河今  
覆勘情形實與原圖不符又奉發照繪黏籤之圖並未呈繳尤爲  
疏漏得旨非疏漏不過恐露出前非耳此等弄巧成拙朕前不可  
○江南周家溝等處河溢○丙午閩浙總督李侍堯奏奉旨令臣  
與兩廣督臣孫士毅再募兵數萬以備調遣但近聞官兵焚燒南  
潭見賊察內糧食就盡夥黨乏食且互相欺奪彼此不睦是南路  
賊匪已有渙散之勢可不必再募兵數萬臣於泉州及沿海各酌  
募兵五千備用如察看臺地情形尙非旦夕可了隨時再行增募  
以新兵存營訓練而以已練之舊兵派往亦足應手得旨籌畫精  
詳可嘉之外無可諭又奏前奉旨令藍元枚帶兵往鹽水港勦賊  
打通糧路但查鹽水港距府城近而距鹿仔港較遠如藍元枚自

鹿仔港帶兵南行而賊兵乘此潛至鹿仔港及北淡水等處滋擾  
則藍元枚又須折回臣因移會藍元枚令其卽從陸路進攻大里  
杙斗門等處直逼賊巢以期一鼓擒獲得旨甚是用兵機宜原當  
相時而動前旨原爲賊占鹽水港也今情形不同汝所辦甚是○  
丁未諭朕寅紹鴻圖仰承 吳眷臨御五十餘年壽踏上臺五世  
一堂錫光篤慶介景延禧尤爲史冊罕覩昇平盛瑞茲王公大臣  
及直省將軍大吏等以乾隆五十五年朕八旬萬壽額請舉行慶  
典豫祝蕃釐覽奏具見誠悃前此朕七旬慶節內外大臣奏懇恭  
祝萬壽朕以徒增糜費未俞所請今內而王公大臣外而將軍督  
撫大吏以朕壽屆八旬臣工身際昌期久承渥澤感激懼忭出自  
積誠朕若仍不允准無以申臣下臚歡祝報之願轉似近於矯情  
且載稽前史三代以後帝王克享大年莅國最久者不過六君其

年逾八旬者僅梁武帝宋高宗二君而其在位則不過三四十年  
一則侯景擅權一則南渡內禪考其事蹟殊不足比數若朕躬膺  
上壽海宇乂甯親理萬幾孜孜不倦五十餘年如一日者實古所  
未有此皆朕仰賴 上天嘉佑 列祖垂庥用能膺受純熙康強  
逢吉尤宜光昭盛軌以答 景既而治輿情著照所請於五十五  
年舉行萬壽典禮所有一切儀文俱恭照朕從前率天下臣民恭  
祝 聖母皇太后六旬七旬八旬 萬壽慶典之例備辦毋得稍  
有加增致滋繁費若內外臣工等不能仰體朕意惟務踵事增華  
鋪張過甚轉非至誠愛戴之心逮時朕亦必不受也至此次慶節  
率土歡騰宜特沛殊恩以光鉅典除普免天下錢糧一節前經降  
旨俟朕歸政之時於嗣君元年再降恩旨蠲免外所有此次應行  
加恩各事宜著內閣及軍機大臣擬開條款進呈候朕酌定另降

諭旨○諭軍機大臣等今日據常青奏到情形則又似南路賊匪  
仍未潰散尙在窺伺滋擾而於賊匪乏食一節並未奏及以掩飾  
其不卽分兵往北之咎是誠何心常青恆瑞同在府城營盤一人  
統兵前往北路一人留營駐守有何可慮豈得因賊匪牽制並不  
那移尺寸之地若云保護村莊則各處村莊甚多卽數萬之兵亦  
不足敷零星分撥防守豈又將增添大兵乎賊匪圍攻鹿仔草遊  
擊邱能成請兵接應常青旣知派兵四百接應何不親統大兵前  
往痛加勦殺廓清路徑似此弁兵四百豈能得力且鹿仔草係僻  
小村莊前後皆有賊匪此四百官兵應需口糧從何接濟若再有  
挫失咎將誰任常青於此等事何茫無主見若此又藍元枚處亦  
屢有旨令其統兵自北而南直抵諸羅合兵會勦乃亦並未前進  
看來常青藍元枚總因持重怯懦畏葸不前常青不免蹈黃仕簡

覆轍而藍元枚遷延觀望亦與任承恩相仿伊二人受恩深重非  
如黃仕簡之老病頽廢任承恩之少不更事者可比若再事因循  
其獲咎將甚於黃仕簡任承恩矣見在浙粵二省駐防綠營及續  
調漳州兵早已到齊計此旨到時節候又屆深秋暑氣已減雨水  
已稀該將軍惟當乘此兵力厚集會合進剿若俟福康安到彼一  
舉歲功伊二人將置身何地耶至南路被脅從賊之人俱請給腰  
牌歸莊該將軍等卽應妥爲撫慰設法招集遵照前旨或令入伍  
或令歸農俾聞風投出解散賊黨方爲妥善○庚戌諭軍機大臣  
等魏大斌援應諸羅而邱能成所押糧餉火藥仍被賊匪梗阻不  
能前進看來竟係賊人狡計將魏大斌放出重圍聽其入城仍將  
糧餉截斷道路梗阻則柴大紀雖與魏大斌會合仍不能勦散賊  
匪而諸縉添此應援之兵糧餉又被截斷更恐軍糧不給著常青

李侍堯將所運諸糧餉火藥究竟仍在鹿仔草或係全行運到及鹿仔草道路會否打通不至梗阻之處迅速馳奏又據李侍堯奏徐鼎士稟稱令鹿仔港大兵密訂進期在大肚溪等處聲援而徐鼎士分兵兩路一攻大肚一攻烏日莊斷城左右烏日一破卽以大礮轟擊大里杙使賊人腹背受敵又可乘高而下爲擣穴擒渠之要策藍元枚前已有旨令其統兵徑赴諸羅會合常青柴大紀今大甲一路旣有可乘之機該參贊又當與徐鼎士速行訂期夾攻直搗賊巢用兵之道原貴相機而動不必拘泥前旨著李侍堯藍元枚傳諭徐鼎士若能督率兵民乘機進剿傾其巢穴則逆匪夥黨聞風解體更無難迅速埽除撲滅是平臺之功徐鼎士實爲第一將來受朕恩眷豈復可量耶徐鼎士務須倍加努力速成大功○辛亥 上自避暑山莊巡幸木蘭行圍○癸丑諭軍機大

臣等據明亮等奏稱老格等帶領官兵追捕燕起至碩提地方分守要隘飭令喀哩提金部落之沙呢雅斯等將燕起擒獲等語老格帶兵追勦燕起雖非親自縛獲究係伊措置有方勞績懋著加恩賞給副都統銜遇缺卽補仍賞銀一百兩並給雲騎尉世職喀哩提金部落之沙呢雅斯薩瑪齊訥德爾默特伯克特木爾等俱著賞給四品頂帶花翎並分賞銀兩見在燕起業經解至喀什噶爾明亮等須派妥幹員弁速解來京勿致中途稍有疏失○乙卯以陸費墀等辦理四庫全書謗脫錯謬奪職鐫級有差○庚申諭軍機大臣等昨據福康安奏稱添派官兵一摺已降旨詳悉閏導指示朕臨御五十餘年於一切重大事務經歷不知凡幾無不通盤籌畫熟慮幾先今委福康安以勦捕之任豈有令其冒險前進之理無論福康安久經簡任寄以股肱心膂事無鉅細無不休戚

相關斷不肯置伊於險地卽常青藍元枚柴大紀等身歷戎行皆  
係爲國家出力亦皆體恤周至圖其萬全下至蔡攀龍徐鼎士及  
大小將弁朕亦無不時加軫念弗令涉險豈有福康安爲朕所親  
信倚任之人轉不爲之計出萬全耶況朕卽不爲福康安一身之  
計甯不爲朕一身國家軍旅重務熟悉籌畫耶朕廬念軍務早夜  
思維揆之天理則朕子惠黎元於臺灣百姓一視同仁並無額外  
徵求之事而以人事言之則林爽文以無藉細民負嵎蟻聚止係  
么虧小醜卽云不肖官吏貪黷斂怨亦俱被伊戕害且肆其荼毒  
地方良民受害者更復不少實爲覆載所不容亦斷無不遠就撲  
滅之理我國家荷蒙 上蒼眷佑軍興之際卽偶遇危難無不轉  
敗爲功如從前光惠之在錫伯阿桂於木果木溫福挫失之後亦  
曾屢經危險旋俱克成大勳況回部金川本其部落用兵撻伐猶

不無戰勝闢土之心至臺灣本屬內地林爽文止係編氓適以自取其死臨以大兵有不如摧枯拉朽速就殄滅者乎從前康熙年間奸民朱一貴糾眾滋事臺灣全郡俱陷經總督滿保派令藍廷珍以一總兵帶兵前往卽能剋期撲滅况見在派如許重兵有福康安等帶同巴圖魯侍衛督率進剿又何難迅奏膚功蓋此等刁悍匪徒一時蟻聚緩則彼此相助急則彼此相圖無論林爽文等罪惡貫盈斷無不立遭誅殛卽萬一逆匪等竝將臺灣全郡搶占而其黨惡匪夥如莊大田等亦斷不肯甘心屈服自必爭爲雄長自相戕害其勢亦必至內潰從前朱一貴占據臺灣後卽有吳姓賊人互相爭鬪之事此卽前事之證是林爽文等縱使大肆猖獗臺灣全郡爲賊所占亦無難設法圖之指日授首況此時賊人占據要隘我兵前往攻勦在賊匪或得以逸待勞若賊匪竊據臺灣

官兵分路進攻則匪徒四處守禦其力亦必難支此乃反客爲主之勢辦理更不至棘手福康安甯未算及此乎朕之待福康安不啻如家人父子恩信實倍尋常福康安亦當以伊父傅恆事朕之心爲心竭力奮勉克紹箕裘並揆度事機驗之天理人心努力堅定副朕體恤周至宵旰焦勞之意一力擔當若遇事輒先涉張皇不特朕將何所倚恃而伊亦將置身何等耶就目前情形而論福康安屢膺軍旅聲威素著今領兵前往賊人計大兵必前抵臺灣郡城自亦專注該處以圖抵禦而此處係久經保守駐兵之所可保無虞福康安竟不必前赴府城應帶領巴圖魯侍衛等由蚶江配渡直抵鹿仔港若藍元枚業已前抵諸羅援應福康安卽應接續前進在後督率會合攻勦如藍元枚尙未前往福康安卽當會同藍元枚並檄知徐鼎士或竟前赴大里杙賊巢夾攻乘虛直擣

俾賊人聞知自必回顧巢穴眷屬則諸羅之圍可不攻而自解而南路賊匪亦必聞風驚潰紛紛解散此爲聲東擊西之計使其首尾不能相應必成擒矣福康安務須安心鎮定出奇制勝勉圖奏捷○辛酉諭軍機大臣等臺灣勦捕賊匪自常青接辦後續期官兵不爲不多乃福康安於途次一見常青之摺遽爲所惑是以未卽准行今再四思維福康安並非不曉事之人於調度機宜豈有不悉心籌畫何至畏難若此推原其意自因於途次接閱常青等奏報情形勢甚急迫而伊前抵廈門尙須時日若俟到彼後該處有不得不添兵之勢臨期再行奏請調撥恐致緩不濟急是以豫爲奏請若故違其意恐伊以兵力不給遇事不能卓有定見轉屬無益今已令保成李慶棻等速將備調黔省兵二千令許世亨帶領速行赴閩聽候調用至湖廣兵不能如黔省之得力且遠隔數

省道里奸回此時亦可無須紛紛遠調福康安既有屯練兵二千  
又得此黔省兵丁是此四千勁兵可抵他省四萬加以節次續調  
之兵軍威已屬壯盛福康安亦可安心鎮靜堅持定見力圖奏績  
不必再存畏難性懦之見○諭蔡攀龍自到臺灣屢次奮勇殺賊  
著有勞績甚屬可嘉所有海壇鎮總兵員缺卽著蔡攀龍補授以  
示獎勵並著常青傳諭蔡攀龍令其加倍奮勉見在帶兵援應諸  
羅務將府城抵諸羅一帶屯聚賊匪悉力勦除廓清道路使糧餉  
火藥隨同官兵運送接濟再賊匪狡黠若蔡攀龍領兵前往未必  
不又施誑誘魏大斌之計讓出道路俟官兵過後復又邀截蔡攀  
龍當探知賊匪潛匿處所前往搜勦方能痛埽無遺廓清道路此  
爲最要再賊人鬼蜮伎倆狡詐百出其所畏憚者係官兵槍礮正  
可用以殺賊乃緣營習氣竟有未見賊匪卽行施放槍礮及賊匪

猝然衝犯轉致措手不及著常青藍元枚等嚴加訓飭於槍手後緊接短兵若賊匪相距較遠不可令其施放槍礮將鉛丸火藥虛擲致賊匪得逞狡計

九月丙寅諭督撫奏請陞見允准後遇該省有大計軍政及文武科場秋審等務俱俟辦竣後再行起程毋移交署任○丁卯諭今日首旗侍衛伊進泰等四人並不帶領首旗行走竟在看城近處等候首旗將到迎出塞責殊屬膽大偷安行圍與行師紀律無異昔太宗聖祖時於圍中失律之人俱曾從重治罪數年來屢經朕從寬宥免伊等毫無畏懼以致首旗侍衛等竟敢如此塞責偷安不可不嚴行懲治伊進泰塔勒必善六十四倭什勒等均著革職伊等查係何處人卽著交該處將軍等令其充當苦差其餘首旗侍衛進德四保亦係未帶領首旗行走但據稱曾至中軍

處較伊進泰等尙屬有閒俱著革職領圖大臣等並分別議處以示炯戒○辛未諭據柴大紀奏官軍在諸羅城外勦殺賊匪城內紳耆鋪民挑送飯食涼水兵丁得不饑渴又據常青李侍堯等奏牌廈村義民運糧接濟諸羅城中各等語該處民人能各知大義踊躍奉公深堪嘉尙自當特沛恩膏以示獎勵著福康安常青李侍堯卽行查明首先倡義之義民頭目一面奏聞一面酌給官職第念各該處義民眾多若僅將頭目給官嘉獎恩施猶未普偏前曾降旨蠲免臺灣本年應徵錢糧著再加恩將五十三年分臺灣府屬應徵錢糧亦槩行豁免並著該將軍等卽行普貼謄黃俾全郡民人共知感激倍加奮勉急公以副朕優獎義民有加無已之至意該部卽遵諭行○諭福建水師提督藍元枚於臺灣逆匪林爽文糾眾滋事以來屢經統領將弁奮勇直前勦殺逆匪並籌畫

一切皆有條理特降旨授爲參贊以示獎勵昨據藍元枚奏染患  
痢證屢次力疾統兵勇往堵勦復降旨賞給大小荷包用昭體恤  
方冀速就痊愈迅奏膺功以承恩敘茲據李侍堯奏藍元枚於八  
月十八日病故聞之深爲憫惻藍元枚著贈太子太保並賞銀一  
千兩以示朕軫念勤勞優卹戎臣之至意所有應得卹典著該部  
察例具奏尋子祭葬謚襄毅○壬申 上駐蹕避暑山莊○諭據  
常青等奏臺灣府知府楊廷樺見已病故所遺員缺暫委海防同  
知楊廷理署理等語楊廷樺自抵臺灣任事後於一切堵禦巡防  
及經理糧餉等事均屬奮勉出力楊廷樺著給還布政使原銜以  
示優卹楊廷理隨營勦捕甚屬奮勉所有臺灣府知府員缺卽著  
楊廷理補授○庚辰 上自避暑山莊回鑾○壬午諭據李侍堯  
奏諸羅勦散賊匪情形一摺內稱常青派令蔡攀龍等帶兵接應

諸羅於八月二十日分隊進剿直抵縣城二十二日復自諸羅帶兵出城勦殺賊匪廓清道路等語諸羅爲臺灣南北兩路要區屢經賊匪窺伺糾眾滋擾柴大紀督率官兵義民悉力捍禦因兵少力單正在望援之際今蔡攀龍同貴林孫全謀揚起麟邱能成等帶領官兵直前攻勦殺散賊匪速達諸羅復帶兵出城將該處屯聚賊匪痛加勦殺實屬奮勇出力可嘉之至蔡攀龍自派赴軍營以來連次打仗殺賊屢著勞績已由遊擊疊加升擢用至總兵此次援應諸羅尤能鼓勇前進往來殺賊宜沛特恩以昭獎勸所有福建水師提督員缺著柴大紀調補其陸路提督員缺卽著蔡攀龍補授並著授爲參贊至副將貴林等協力攻勦俱屬奮勇可嘉亦應加恩升擢前此常青派令總兵魏大斌援應諸羅在中途被賊攔阻及抵諸羅後又止知坐守縣城並未能帶兵出城勦散賊

匪實屬畏葸無能魏大斌著革職交福康安留於軍前效力贖罪  
所遺浙江溫州鎮總兵員缺卽著貴林補授貴林所遺廣東羅定  
協副將員缺卽著孫全謀補授孫全謀所遺廣東大鵬營參將員  
缺卽著楊起麟補授其遊擊卽能成著交福康安遇有參將缺出  
卽奏請升補除蔡攀龍貴林已賞花翎外孫全謀楊起麟卽能成  
俱著賞戴花翎以示鼓勵○癸未諭軍機大臣等孫士毅等奏接  
安南國嗣孫黎維祁咨覆失去國印一事因該國文移內並無將  
來具本遣陪臣之語未便卽如所請並將所擬檄諭文稟一併進  
呈所辦是惟是孫士毅等辦理此事尙有未盡周到之處該國旣  
請給印信固應具本恭遣陪臣齋達方符定制念該國臣服我朝  
最爲恭順黎維祁旣經病故伊嗣孫自必顧請襲封若於遣官請  
給國印之後又復具本請封未免往來跋涉自應將憲請襲封給

印二事一併具本遣官陳奏以示體恤遠藩之至意見令軍機大臣將此一節改入發去諭以准該國嗣孫黎維祁咨覆知爾祖國王暮年衰耄鄭氏弄權脅印私藏旋因西山侵擾兵火之中不知印信失落何處並非有人攘竊四處搜尋迄無所獲纔十數日爾祖病篤西山擁兵甫退鄭孽乘虛復起又數月而亂始定所有爾國失印無追及爾祖病故咨報遲滯緣由俱悉但思爾祖病故爾國未經具題告哀大皇帝尙未聞知承襲一事何敢代爲聲請且爾嗣孫旣未承襲藩封則名號未定將何字樣給爲憑信事理未順礙難陳奏爾嗣孫自應一面恭遣陪臣詣闈告哀並於本內聲敘遲滯緣由冀邀大皇帝垂鑒一面仰祈恩命准爾嗣孫繼序外藩永延先緒並將失印始末據實敷陳大皇帝念爾臣事天朝素稱恭順自必恩俞嗣服敕部重給篆文用昭世守夫告哀請封乃

爾國大事失印補鑄在其次也此係非常恩寵豈本部院所敢顧求況爾祖國王既經病故爾嗣孫黎維祁尙未請封自必恭遣陪臣齎本奏懇若於遣官請給國印之後又復具本請封未免往來跋涉非天朝體恤遠藩之意爾嗣孫自應將請封給印二事一併具本陳奏並卽遴選陪臣齎本題達庶幾渥膺主眷弗墜前勸該督卽遵照繕寫檄諭將此諭令知之○丙戌 上還京師○辛卯諭軍機大臣等前據李侍堯奏蔡攀龍等已抵諸羅後又帶兵出城殺賊今據奏到各情形是此次赴援之兵又未得手貴林楊起麟係隨同蔡攀龍帶兵援應諸羅今蔡攀龍雖經柴大紀接應入城仍未能殺出而貴林楊起麟又無下落自係被賊匪攔截若有意外之虞豈不可惜福康安此時自早已由蚶江配渡前抵鹿仔港該處兵力極爲壯盛福康安竟當派撥巴圖魯侍衛章京二十

人令舒亮帶領前往徐鼎士處若徐鼎士已由大甲溪進兵舒亮等卽速往幫同勦賊卽徐鼎士尙未進兵亦應令舒亮速往會同攻擊而福康安一面同海蘭察等統領巴圖魯侍衛章京督率大兵以全力往大里杙進勦該處係賊匪巢穴一聞大兵攻擊賊首等自必回顧諸羅之圍不解而自解福康安應豫先知會柴大紀等如賊匪回救巢穴卽令柴大紀恆瑞蔡攀龍等領兵出城由後跟蹤追勦而福康安迎頭截殺使其首尾受困自可悉數成擒儻賊匪仍在諸羅不顧巢穴則福康安於堵平大里杙後卽回兵移救諸羅賊匪見巢穴已傾自可不戰而潰最爲善策此卽從前諭旨內所引魏司馬懿欲擒公孫淵先破襄平之計福康安不可不決機制勝至普吉保如尙在西螺一帶駐守福康安不妨將普吉保撤回鹿仔港與李化龍協同防守福康安竟帶其五千兵進擣

大里杙則兵力旣加更可鼓勇前進惟在福康安相度機宜斟酌  
妥辦再柴大紀處於蔡攀龍抵縣後總未據有奏報恆瑞所駐鹽  
水港距諸羅甚近著卽派委妥幹員弁設法前往諸羅令柴大紀  
蔡攀龍將該處實在情形及如何籌辦之處詳晰聲敘仍遴委能  
事員弁設法齎送卽行迅速馳奏

冬十月乙未朔諭乾隆五十五年朕八旬慶節宜沛特恩所有下  
屆鄉會試正科著於五十三年八月五十四年三月豫先舉行五  
十四年秋舉行恩科鄉試五十五年春舉行恩科會試以示樂育  
敷恩壽世作人至意○諭朕前披閱朱載堉樂律全書樂譜內填  
注五六工尺上等字並未兼注宮商角徵羽而於雅頌烝民思文  
諸詩以時俗豆葉黃等牌名小令分譜未免援古而入於俗又所  
著琴譜一絃之內用正應和同四聲長至十六彈不勝其冗而一

音之中已有抑揚高下是徒滋繁縟而近於靡曼有類時曲曾經  
降旨交皇六子永瑢及鄒奕孝等將朱載堉樂律全書內疏漏歧  
誤之處詳晰訂正分別各條載於本書提要之後以垂永久而昭  
雅正因思詩三百篇皆可歌詠魏晉時尚有文王鹿鳴等四章但  
未著宮調學者茫然不知而朱載堉譜又固執周詩不用商聲之  
說以角調譜國風徵調譜小雅羽調譜周頌而專以商調譜商頌  
夫商調乃宮商之商非夏商之商此其穿鑿拘墟不待辨而自明  
豈足與言五音述三百哉且古樂皆主一字一音虞書依永和聲  
雖有清濁長短之節合之五聲六律止於一句數字內分抑揚高  
下不得於一字一音之內參以曼聲後世古法漸湮取悅聽者之  
耳多有一字而曼引至數聲此乃時俗優伶所爲正古人所譏煩  
手之音未足與音樂也從前朕親定韶樂納釋 皇祖欽定律呂

正義考訂精審皆主一字一音實爲古樂正聲永當遵守見在朝會大典鐘磬鑼鈸極莊雅朕前於經筵之典令歌抑戒之詩於瓊林鷹揚兩宴令歌棫樸干城之詩皆親爲指定而三百篇全詩三代以後未有全行譜定者朱載堉所譜又復雜以俗調或自行杜撰不可爲訓所當詳加訂正叶之官商俾操緩安絃之士皆得矢詩遂歌更足以昭美盛著派皇子等會同樂部大臣悉心精覈其詩篇內應用某宮某調者俱著詳審文義定爲某宮某調仍於各譜駢注七音字樣彙成一書俾四始六義之文皆可歌詠分別節度悉符正始元音庶幾考古而益進於古以副朕條理集成立序○丙申以管幹貞爲內閣學士由光祿寺卿遷○戊戌諭成都將軍鄂輝見在帶領四川屯練兵丁赴臺灣勦捕賊匪鄂輝久歷行陣於

軍旅較爲諳習亦著授爲參贊協同福康安籌辦進剿以期迅奏  
庸功○諭軍機大臣等福康安由廈門配渡前赴鹿仔港仍聲言  
由鹿耳門前進使賊匪猝不及防所辦甚好其所稱常青等調度  
失宜官兵多有損失及南北兩路賊匪處處相通而我兵相距遼  
遠聲勢不能聯絡各情節實爲切中肯綮福康安於抵鹿仔港後  
振作士氣鎮定人心探視賊蹤所至沿途搜勦實爲此時要著至  
賊人狡猾伎倆往往於官兵過後阻截道路今福康安擬將賊匪  
屯聚相連之處併力截斷使其首尾不能相顧是卽因賊人之巧  
計用以攻賊俾官兵所過之地不至旋通旋塞深合機宜惟福康  
安摺內所稱沿途搜勦一節賊匪到處屯聚所過村莊民人多被  
迫脅今福康安統兵進剿其經過地方固應乘勢掃除不使於官  
兵過後潛出滋擾但所過村莊若悉行殲戮恐一處被官兵剿洗

而他處聞風畏懼轉堅其助賊之心若不留心防範而於所過村莊聽其聚處又恐奸猾之徒於官兵過後生心梗阻致爲肘腋之患福康安務須隨時體訪加意密防使良善得安其心而奸宄無由逞其伎倆此爲最要所過之處其原派駐守官兵不可輕易撤調以免疏虞○庚子改河南蘭儀通判爲同知○戊申命修陵○己酉河南睢州十三堡合龍○庚戌福康安奏此次由鹿仔港進剿必須南北兩路併力合攻使賊匪分散見咨會常青恆瑞柴大紀蔡攀龍等臨期合攻一面撫諭附近被脅民人令其各保村莊殺賊自效道路自無虞梗塞然後進逼大里杙約會淡水官兵由烏日莊夾攻並令侍衛帶兵在牛罵快官等莊杜其奔竄之路不難一鼓殲擒俟臣到彼如有應行布置再當相機妥辦諭軍機大臣等福康安奏籌辦勦捕事宜與朕節次所降諭旨雖大同

小異然已俱得要領就此時情形而論自先以援救諸羅爲要福  
康安到鹿仔港後等候川黔廣西兵到齊卽直抵諸羅柴大紀蔡  
攀龍在彼日久於該處情形自爲熟悉福康安當與之悉心籌畫  
至臺灣府城見有常青在彼看來雖未能進取而自守尙屬有餘  
即使府城守禦難支或竟有疏虞之事亦不難再爲收復福康安  
不必因身當重寄不能爲郡城保全卽爲有負任使心懷疑慮以  
致顧此瞻彼所帶巴圖魯侍衛章京等皆係久經行陣於行軍機  
宜皆能熟悉統兵進剿時其旁路後路或有賊匪潛出滋擾伊等  
自能隨時察看豫行防範不至墮賊狡計○諭嗣後鹽務各員銓  
選分發俱迴避本省著爲令○甲寅賜馬兆瑞等三十六人武進  
士及第出身有差○丙辰諭孟生蕙奏請停止劉毅所奏昌平州  
開採硫磺一摺內稱該州坐落正當京城乾坎之位其山卽京城

北面之屏障山以虛受氣以實流實者削之使虛則甚易虛者補之復實則甚難等語所奏已屬迂謬至摺內復稱安畿輔數百里內之坤輿葆神京億萬斯年之元氣則國家幸甚天下幸甚措語更屬荒誕京城外西山北山一帶開採煤窯及鑿取石塊自元明以來迄今數百餘年取之無盡用之不竭從未聞以關繫風水設有例禁豈開採硫磺遂致於地脈有礙卽云開設礦廠恐聚集多人滋擾地方則每歲採取煤斤石料所用人夫不知凡幾豈皆良善安分之徒何以並未見有滋生事端之處乃孟生蕙摺內妄以坤輿元氣爲辭並以封閉開採爲天下國家之幸夫此等重語在楊繼盛參嚴嵩楊漣參魏忠賢用之則可今有其人有其事乎明朝科道朋黨惡習好爲虛詞激成廷杖爲榮以致屋社終無益於國且開一礦廠何關緊要而張大其詞若此況昌平係前明陵寢

所在若以開挖礦廠有礙昌平風水隱爲明陵起見則孟生蕙恐  
不能當此罪戾且料伊庸陋之見未必竟敢如此設想亦不值加  
以深究耳孟生蕙人本平常今年夏閒在熱河召見奏對模糊其  
才具已久在洞鑒之內伊不過因近有京卿缺出日內正在題本  
輒先爲此奏妄思見長以爲邀恩升用地步其居心殊爲狠鄙妄  
詐昨內閣進呈吏部題本因伊係開列應升之員况員缺並非繁  
要朕因山西在朝之大員少原已將孟生蕙補用今伊所奏如此  
支離荒謬卽不重治其罪豈可復邀升擢所有吏部缺本著卽撤  
回候朕另行飭用孟生蕙仍著交部嚴加議處至昌平州開採硫  
磺一事孟生蕙旣有此奏其產磺處旺情形應否開採之處亦宜  
查勘確實阿彌達見赴昌平州查看明陵工程著派蔣賜棨卽赴  
該處與阿彌達帶同該地方官親至產磺處所詳悉履勘如該處

產礮旺盛自應設廠開採以資軍火之需若所產不旺卽行據實奏明封閉停採亦不必因有此奏稍存迴護之見孟生蕙原摺著挪還尋奏勘得礮礮見有礮綫三條鉛綫一條請准依綫開採報聞○命阿桂赴江南勘高堰等處隄工○丁巳諭據李侍堯奏接同知吳元琪稟稱九月初一日柴大紀有信至府城稱蔡攀龍等援兵惟蔡攀龍孫全謀帶兵七八百名及運送糧餉之義民三千名到諸羅其貴林楊起麟杭富俱在正音莊陣亡等語貴林等前經常青派赴諸羅援應奮勇打仗甚爲出力是以降旨將貴林補授總兵楊起麟補授參將並俱賞戴花翎今貴林楊起麟同都司杭富因勦捕賊匪臨陣捐軀殊屬可憫貴林著照總兵例議卹楊起麟前在鹽水港一帶堵禦防守尤爲出力著加一等照副將之例議卹其都司杭富亦著照例議卹以示憫恤○庚申諭軍機大

臣等據孫士毅奏安南國王失去印信請於鑄給該嗣孫印篆內  
加刊補給字樣等語安南臣服我朝素爲恭順今既失去印信自  
應補行鑄給該督所稱西山阮姓與鄭姓仇殺遺失印信或爲阮  
姓藏匿將來恐有私用印文假冒混遞之弊是刊給新印自當與  
舊印稍有區別使粵省官吏遇有與該國交涉事件驗看印信可  
以一目了然辨別真偽但所稱加刊補給字樣於體制不合孫士  
毅尙未能斟酌周到惟應查明該國印篆文內如係篆刻安南國  
王之印字樣則新鑄印篆內卽應刪去之字若係篆刻安南國王  
印字樣則新鑄印篆卽應加刊之字如此示以分別既可以杜阮  
姓假冒之弊而粵省地方官與該國王遞送咨呈字件不難立辨  
真假且於體制相符著傳諭孫士毅於該國嗣孫遣使懇請襲封  
給印時詳悉諭以天朝因爾國遭遇事故甫經安輯若補給新印

後其舊印仍未銷毀或爲匪徒私藏混用假冒該國名號呈演天朝於爾國轉爲有損無益今於新給印文與舊印不同俾督關文武官吏查驗有據不至真僞溷淆天朝體恤周至兩國當慎遵恪守永承天眷等語著孫士毅存記於該國請印時遵照辦理

十一月甲子朔諭見在勦捕臺灣逆匪總督李侍堯孫士毅於調兵運餉等務辦理迅速甚爲妥協殊屬可嘉李侍堯孫士毅俱著加太子太保銜至參贊提督柴大紀自駐禁諸羅以來屢經奮勇抵禦勦殺賊匪洵爲懋著勞績著加太子少保銜以示嘉獎○諭軍機大臣等廣東莊民同心向義視賊如仇雖以業經投誠之莊錫舍猶因其曾經從賊不肯與之會合此亦足以見其義憤莊錫舍因粵民不與協力勦賊益加激勵奮不顧身獨與賊匪打仗以致受傷甚屬出力可嘉著加都司職銜事完送部引見再賞銀二

百兩以示獎勵並著曉諭廣東莊義民等以莊錫舍雖經從賊不與一同打仗固屬義舉但見在業已投誠屢次打仗殺賊卽與帶兵官弁無異嗣後該義民不必心存歧視止當其效投戈之義協力勦賊以期共伸義憤承受恩賞賊目莊大田因其黨羽漸次解散將家眷搬移潛伏石仔瀨地方其勢已爲窮蹙南路村莊民人見大兵雲集賊黨解體指日卽就殲擒惟恐官兵一到無從自白致獲罪愆紛紛赴常青處呈請賞給腰牌以爲識別可見該處民人已知賊勢窮蹙爭先自爲別白率眾具呈而常青給與腰牌將來安分良民俱可辨識該民人等益可安心守業以助官軍聲勢見在南路情形旣係如此則北路一帶村莊民人近見福康安統領勁兵前抵鹿仔港自必更歡呼踊躍共慶平康福康安於所過地方其各村莊安分民人亦當照常青所辦賞給腰牌俾令各有

識別安莊服業自爲守禦既可以安輯眾心且於官兵進剿後路更資協助無慮賊人潛出滋擾尤爲妥善至臺灣義民甚多而廣東泉州二處民人尤爲急公隨同官兵打仗殺賊屢經出力自康熙年間廣東莊義民勦賊有功經總督滿保賞給懷忠效忠等扁額是以民人等咸知嚮義踊躍自效但前次扁額止係總督所給伊等已如此感激奮勵今將廣東莊泉州莊義民朕皆特賜扁額用旌義勇伊等自必倍加鼓舞奮力抒忠但該處莊居甚多難徧行頒賜著福康安接到扁額後卽遵照鈎摹擇其大莊羣居處所普加賞給懸設並傳旨曉諭以伊等義勇素著出力可嘉是以欽頒扁額賞賜以示優獎俾該民人等益加感奮竭力圖效以堅其向義之心至淡水一帶見在並無賊擾卽大甲溪偏近大里杙賊巢地方緊要該處義民等隨同官兵堵禦防守頗爲出力卽日大

兵進剿該處會合夾攻正當鼓勵義勇協力助剿若此時因伊等  
口糧過多輒議裁減恐義民等貲糧不給或致漸行散去轉阻其  
急公效用之心殊屬失策徐嗣曾見將銀米添解接濟並令該處  
員弁妥爲安撫酌量支給使義民等口食充裕招徠日廣將來大  
兵進攻正可得其協助甚合機宜所有各處義民口糧俱應照常  
支給不可輕議裁減但此時逆首林爽文在諸羅被官兵殺退手  
殼中傷見在牛稠山逃竄醫治賊目莊大田又因黨夥漸散將家  
屬移入大武壠自在石仔瀨潛伏是賊首賊目等屢經官兵剿殺  
正在奔潰竄匿之時福康安到鹿仔港後自必先從大里杙夾攻  
將林爽文跟蹤追捕以期一鼓擒獲至徐鼎士率領兵民分路進  
取福康安若因該處需兵接應不妨於普爾普舒亮二人內酌派  
一人帶領巴圖魯侍衛章京十數人兵二三千前往會合徐鼎士

併力攻勦更爲得力○丙寅諭臺灣逆匪林爽文糾眾倡亂以來  
提督柴大紀統兵勦捕收復諸羅後賊匪屢經攻擾城內義民幫  
同官兵奮力守禦保護無虞該處民人急公向義眾志成城應錫  
嘉名以旌斯邑著將諸羅縣改爲嘉義縣俾合縣良民倍加奮勵  
以昭獎勸○賀黃仕簡任承恩罪仍逮繫○丁卯諭普吉保前由  
大突溪往笨港勦賊克復笨港已降旨交部議敘茲復督率將弁  
兵丁奮力勦殺前後打死賊匪五六百人奪獲器械甚多奮勇可  
嘉除普吉保業經議敘優賞外其隨同出力之官弁並著將軍福  
康安一併查明咨部分別議敘以示獎勵○己巳諭軍機大臣等  
朕明春臨幸天津巡視海淀向來直隸淀河一帶豫備綵棚戲臺  
並設有採蓮船隻等件徒滋糜費殊屬無謂著傳諭劉毅此次臨  
幸天津經過地方於此等無益之費槩不必豫備至天津商人等

情殷愛戴於朕臨幸處所向或偶有點綴雖不便槩行禁止但不可過事浮靡致多繁費並著穆騰額諭令該商等務宜仰體朕意止須照常豫備毋得侈爲觀美以副朕崇實黜華之至意○庚午諭據喀甯阿等奏考試八旗各處滿洲教習人等進呈試卷內所繙風俗字樣俱繙安科禮此雖照舊定成語但初定時已失字意矣蓋久行不易者謂之科禮隨時成習者謂之風俗理應繙作格掄尼塔親除見將進呈試卷改正外著交繙書房將清文鑑亦照依改正宣示各處遵行從前德通所繙清語內阿岱所不曉者甚多阿岱善於清語何至不曉究係德通固執漢文拘泥成語不能會意以致繙成漢文語氣阿岱始不能明晰會經降旨以繙清必順滿文會意方可令人易曉若舍滿文語氣因循漢文繙譯則竟至失卻滿文本義著將此再通行各處嗣後一切繙清必遵朕屢

次訓旨遵照滿文本義繙譯斷不可拘泥漢文再今日進呈試卷  
逐一閱視立意措辭大類相同恐有不肖之徒濫圖僥倖互相代  
情情弊著嚴飭嗣後派出之考試大臣御史等須嚴行監試儻經  
察出弊竇一併從重治罪○王申諭柴大紀奏接到常青札稱昨  
已有旨交柴大紀不必拘泥與城存亡之見設遇緊急卽帶兵殺  
出縣城再圖進取等因惟思諸羅地居臺灣南北之中其縣城四  
面堆土種竹在圍中本難爲守前此克復後環營開溝並堆矮墻  
安設礮位營盤甚屬堅固若一旦棄之而去則城池營盤大礮均  
爲賊匪所據恐賊勢益張鹽水港笨港兩路之兵均難駐守且城  
廂內外住居百姓及各莊避難入城者共有四萬餘人至今協力  
守禦並捐助軍糈急公向義實不忍將此數萬生靈盡付逆賊毒  
手見在恆瑞住鹽水港普吉保駐元長莊距諸羅俱不過三四十

里三方鼎峙聲勢壯盛惟有竭力保守縣城以待援兵齊集併力進勦擒拏逆首等語所奏忠肝義膽披覽之下爲之墮淚前因新改嘉義之諸羅屢次被賊滋擾柴大紀數月以來激励官兵義民悉力守禦保護城池但該處賊匪雖屢經柴大紀勦殺仍四處屯聚心生窺伺百計攻擾而常青等先後派援之兵未能卽時齊到縣城惟恐柴大紀激於忠憤堅守城存與存城亡與亡之義固守弗去是以降旨令柴大紀酌量情形如力有難支不妨率領官兵整隊而出並因該處義民幫同柴大紀守城殺賊甚爲出力若柴大紀帶兵出城此等義民必致受賊戕害朕心更爲不忍復諭令柴大紀如縣城萬難守禦必須出城另圖進取之時務將城內義民及其家屬妥爲捍衛先行送去俾義民不至失所經常青等將此旨齎送柴大紀閱看而柴大紀以縣城一切守禦事宜久經布

置周密且因縣城內外居民甚多不忍將數萬生靈委之於賊立  
意堅守以待援應是其保護合縣民人與朕軫念義民多方愛護  
之意適相脗合所謂我君臣各盡其義也柴大紀力捍圍城且能  
乘閒殺賊已屬奮勇可嘉今接奉前旨若卽全師而出亦係遵旨  
而行未爲不可而柴大紀被圍日久心志益堅勉勵兵民忍飢固  
守惟知以國事民生爲重古之名將何以加之柴大紀在臺灣勦  
捕賊匪勞績最著卽守城一節其功甚大本欲俟大功告竣後優  
加封賞今伊如此繫念民生忠貞激發爲國家出力尤堪嘉獎柴  
大紀著卽封爲一等義勇伯世襲罔替並著浙江巡撫頒珎賞給  
伊家屬銀一萬兩用示朕軫念勤勞錫爵酬庸之至意至柴大紀  
忠勇奮發兵民富益加感動仰蒙上天嘉佑縣城自必保護無虞  
見在福康安統領大兵迅抵鹿仔港聲威壯盛士氣百倍柴大紀

惟當更加勉力痛勦賊匪共奏膚功永承格外恩眷○諭嘉義縣  
城被賊攻圍已閱半載而民人等共知大義幫同官兵奮力把守  
久而益堅實堪嘉尙除節經降旨將臺灣府屬本年及五十三年  
應徵錢糧豁免著再加恩將嘉義縣五十四年應徵錢糧再行豁  
免以示朕優獎忠義有加無已至意○乙亥諭向例每年葉爾羌  
和闐春秋二季採玉輸納該處回人按季跟隨大臣無甚閒暇俱  
各奮勉旣應酌量施恩以矜其力而此時節次採運之玉亦足充  
用嗣後每年春季停止採納惟秋季仍令採玉解運自明年起卽  
著爲令以示朕惠愛回人之意○諭軍機大臣等前因恆瑞抵鹽  
水港後被賊梗阻府城亦在圍中而柴大紀處望援甚切是以降  
旨督令福康安速往救援進勦賊巢原就彼時情事而言今柴大  
紀處兵民一心堅守可無他慮而恆瑞處已有續到官兵可以約

會普吉保合兵前進是該處情形與前不同李侍堯接閱各官稟報見軍營各路已有轉機惟恐常青接到前旨稍有宣露轉致府城人心搖動擬將諭旨節錄發寄並札會常青福康安兩處深合機要殊得大臣之體李侍堯著賞戴雙眼花翎以示優眷大武壠地方與內山偏近今賊匪等將家口先行搬移自係聞大兵卽日前進匪黨勢漸窮蹙豫爲鼠入內山之計不可不設法堵禦絕其逃竄之路福康安到鹿仔港後自卽親統大兵由普吉保一路直抵縣城接應柴大紀其大武壠一帶最關緊要福康安或派令鄂輝帶兵前往搜捕或抵縣城後帶兵有人卽令柴大紀前赴大武壠搜捕方可將賊匪家屬悉數擊獲不使逆黨竄入內山搜捕致稽時日○戊寅諭御史李陽穀奏部議降調有級紀不敷抵銷人員其有情節較重不准捐復者請於議處時嚴爲酌定不致先後

兩歧一摺內所稱毛振翮蔣基培報捐准一不准似屬上下其手不知二案該部俱經議駁朕閱其案情毛振翮係山西高平縣知縣因紳士捐修鼓樓並不詳請候示其事尙屬因公是以降旨仍准其捐復至山東東平州知州蔣基培於所屬捕役拖糞無事事關人命是以卽照部議不准捐復是此二案吏部皆係一體議駁具奏而准與否皆出自朕定並非部臣辦理兩歧所能高下其手况見在綱紀肅清內外庶政亦斷無敢有意存軒輊之理乃該御史率行援引入奏已屬無謂至所稱嗣後捐復人員其情節較重無級可抵者應照舊酌覈請旨其有加級紀錄而不敷抵銷者應嚴爲酌定等語是此後被議各員凡有加級紀錄不敷抵銷者皆得援以爲詞廣其捐復之路是語從嚴而意從寬非激敘官方覈實辦理之道此乃取巧或受人指使然朕亦不深究耳但該御

史既有此奏除兼管吏部之員應行迴避外著今日進見之嵇璜  
王杰福長安董誥彭元瑞胡季堂金簡會同詳查例案悉心妥議  
具奏○己卯歲禮寶丁憂以英善署廣西布政使○乙酉諭據保  
甯奏潼川府知府張松孫因病懇請回籍調理所遺員缺請以龍  
安府知府賈廷彥調補一摺已批交該部議奏矣向來道府告病  
人員自雍正年間改定條例惟准督撫題請解任調理至應否回  
籍由內閣票擬雙籤請旨其中有准回籍者亦有不准回籍者所  
以防規避而杜瞻徇立法至爲詳善朕臨御以來俱係遵循辦理  
然亦多有令其回籍者今該督於具題卽行奏請回籍則內閣又  
何必雙籤請旨耶著通飭各督撫嗣後遇有道府以上告病人員  
止應循向例題請解任調理其准令回籍與否聽候部議請旨毋  
得違請回籍以符定制保甯著飭行○以保甯爲伊犁將軍調李

世傑爲四川總督以書麟爲兩江總督陳用敷爲安徽巡撫○丁亥福康安等奏帶領巴圖魯侍衛等至八卦山一帶殺賊得勝情形諭軍機大臣等此次海蘭察所帶巴圖魯侍衛止二十餘人卽能直抵賊人設卡處所殺死賊匪擒拏活口士氣人心爲之一振洵爲事機順利極好吉兆柴大紀力捍圍城城中糧食大約久已缺乏今花生地瓜等物又俱用盡兵民至以油飴充餓亦恐不敷接續而恆瑞普吉保兩路又未能卽時前進柴大紀望援急迫福康安自應卽由元長莊笨港一帶統兵速進勦殺沿途賊匪徑達縣城至普吉保自鹿仔港進兵後業經收復笨港進至元長莊又經移營距縣不過五里儻能身先士卒奮力勦殺直抵縣城朕必深爲嘉許施恩格外且爲普吉保計卽因賊勢鴟張難以輕動與其株守中途進退失據孰若力戰入城卽至勢有難支與柴大紀

協同固守受困猶覺有丈夫氣槩今似此遷延見在福康安大兵已到卽普吉保福命淺薄之處至恆瑞自駐兵鹽水港後爲日已久所帶官兵比普吉保爲多乃並無寸進亦未打仗得勝是恆瑞之咎已視普吉保爲重且見據柴大紀奏接總兵梁朝桂咨稱凡事皆由恆瑞主持事之能行與否亦不敢自專等語是梁朝桂亦知柴大紀處望援甚切急應前進而語意之間似不免恆瑞有掣肘之處看來恆瑞竟係按兵不舉或因不能親自往救柴大紀而梁朝桂稟請赴援竟至有心阻止著福康安卽確切查明據實嚴參不得稍有徇隱○庚寅諭軍機大臣等前據李奉翰奏請於三溝閘池下添建西堤一事朕卽以該處從前本無堤岸凡遇水漲年分民田廬舍亦俱保護無虞且一經添建堤工每年卽須有歲修等事尤易啓工員冒濫支銷之漸似可無庸添建是以特諭阿

桂前往查勘今據阿桂勘明具奏亦以該處若添建西隄橫加攔截盛漲時必致湖水蓄高口愈窄則力愈猛西隄一有疏虞東隄亦復難保恐潰決尚不止此應將創建西隄之處竟行停止等語可見添築西隄實屬無庸辦理之事看來竟係李奉翰輕聽屬員之言率行陳奏爲屬員冒銷地步從來辦理河工事務雖情形難以懸揣但事理之當否自有一定原屬顯而易見今李世傑等所請建隄之處一面臨湖一面係屬運河若於該處建隄是在水中施工豈能經久穩固卽如高家堰海塘等處興修工段皆係就該處隄岸施工建築自可久資捍衛今於水中輕議建隄豈非有名無實況該處向無隄岸日久相安並未聞有創議添築者李世傑等乃欲爲此無益之舉殊屬非是俟李奉翰到京日再行詢問外至李世傑歷任督撫有年於此等事務豈竟不能見及亦隨同率

奏殊屬疏忽前因李世傑在四川總督任內辦理地方事務尙能妥協是以調任兩江乃伊自到任後並未見實力整頓遇事每有錯誤前於查辦稍礪一事既輕聽人言巧詞支飾又曾奏江南各屬虧空於一二年內可盡行補足今皆完否亦未行奏聞今於添建隄工又不權衡事理被工員怨懣率爲此奏是其辦事竟不如前見四川省地方亦屬緊要李世傑在彼有年諳悉該處情形是以將伊調往以期駕輕就熟該省番地新疆及西藏各事宜最關緊要務須悉心經理妥協以副委任况李世傑受恩深重年逾七旬正應及時勉力自效儻以四川省分視兩江較簡今將伊調任遂心存懈怠不肯實心任事於地方諸務又如在兩江之因循錯謬朕必重治其罪至書麟見已擢用兩江總督地方河務皆伊專責尤應隨事實心辦理效法伊叔祖高斌及伊父高晉以期不墜

家聲承受恩眷不可稍存自滿又復遇事顙預方爲不負任使然  
李世傑李奉翰非竟不諳河務之人乃創議於湖中添築長隄或  
係伊等強作解事欲藉此爲名以爲將來想請南巡親臨閱視此  
則所見尤謬從前康熙年間該省督撫曾欲於高家壩內添築一  
堤以爲重門保障奏請聖祖臨視駕幸江南閱看議建之隄  
辦理錯謬卽降旨駁飭並將該督撫等治罪今伊等不可踵其故  
轍復爲此舉况朕臨御以來業經六巡江浙省方問俗於民生吏  
治俱已洞悉無遺自可無庸復行親莅該督等尤宜仰體朕意不  
必妄存臆度之見以爲取巧地步也將此傳諭李世傑書麟並諭  
阿桂知之

十二月己亥諭舊制坤寧宮每日祀神祭肉理應潔淨熟暖給  
散秩大臣及侍衛等分食乃近來該首領太監等每將整塊好肉

私行偷用以冷肉及瘦瘠殘廢皮骨分給充數以致散秩大臣侍衛等進內食肉者漸少滿洲舊制祭祀敬神祭肉晚間背鑑者例交膳房散給各處其早間所供者例不准出廟門原承不留神惠之意乃風俗不古散秩大臣侍衛等或竟不以此爲榮反以爲辱固屬非是但太監等私藏好肉以平常之肉給食尤不可不嚴行查禁嗣後祀神祭肉著派總管太監劉成專管每日與肉之時仍著派御前侍衛一員乾清門侍衛二員同與肉之侍衛等進宮一體分食並徧加查看如有仍前弊端卽據實具奏務將總管太監全行治罪外其派出專管之總管太監劉成加倍治罪如劉成遇有疾病等事卽著該總管太監等奏請另派仍著總管內務府大臣於宮廷內外隨時稽查儻有私行偷出售賣者卽行嚴拏究辦再膳房辦給大臣阿哥師傅侍衛等項官飯近來亦多偷

減平常有名無實並著該管大臣一體查察毋得仍前草率偷減  
備經查出一併從重治罪○壬寅諭嗣後科道題升引見註明有  
無條奏著爲令○丁未諭福康安奏十一月初六日帶兵援嘉義  
縣初七日行抵元長莊又於普吉保所帶官兵內挑新舊兵丁義  
民分爲五隊福康安與海蘭察鄂輝普爾普穆克登阿普吉保額  
勒登保及巴圖魯侍衛章京等分隊帶領凡遇賊莊卽行剿洗互  
爲援應初八日黎明行抵崙仔頂地方賊匪多人潛於竹圍內施  
放槍礮一齊擁出我兵屹立不動槍箭齊發福康安海蘭察等帶  
同巴圖魯侍衛衝入賊中賊匪抵敵不住退入竹林兩傍竹圍蔗  
田內及崙仔尾等處各莊賊匪或數百人或千餘人前來抗拒福  
康安豫爲布置調令鄂輝穆克登阿帶領屯練降番扼住右首東  
莊溪橋普爾普侍衛春甯參將吳宗茂等帶兵堵勦左首各莊賊

眾並遣義民分頭焚破竹圍蔗田及各處草寮當將崙仔頂莊崙仔尾莊打通一面令海蘭察帶巴圖魯侍衛總兵普吉保及奮勇官兵長驅先進福康安將各處賊莊盡力攻勦無不克捷進至牛稠地方賊匪阻溪自固在山梁屯紮見官兵將至四面圍裏不下萬餘海蘭察帶同巴圖魯侍衛官兵直越溪河衝過賊隊我兵無不一以當百搶上山梁賊匪紛紛逃竄卽於酉刻入城見在督率官兵卽由斗六門進攻大里杙賊巢擒拏賊匪首目等語逆匪林爽文糾集賊黨滋擾嘉義縣城攻圍數月經常青屢次派兵往援俱被賊匪阻截柴大紀在城內率領官兵義民悉力保護若援兵再遲十日縣城卽難固守福康安海蘭察能督率將弁官兵鼓勇直進並不俟貴州湖南續調官兵到齊卽將見有兵民分爲五隊派鄂輝等分隊帶領沿途勦殺賊匪俱能奮勉直進不避險阻越

過溪河將各處村莊屯聚之賊匪竊加殲殺直抵縣城數月之圍應手而解城內數萬生靈均獲更生之慶並將賊人存貯糧米運入縣城軍糈民食益資充裕此皆福康安等調度有方振作士氣用能克敵致果迅奏捷音自應優加寵錫福康安海蘭察俱係侯爵著晉封公爵各賞紅寶石帽頂四團龍補褂以示優異其鄂輝舒亮普爾普等及巴圖魯侍衛章京並在事出力之鎮將弁員等俱能率領兵民鼓勇奏績著查明咨部一併從優議敘○諭軍機大臣等見在審訊燕起及與鄂斯瑞質對除俯首認罪外據稱伊母與弟鄂布拉三鄂布拉塔齊里克齊並家口多人見饑寒乞食必至妄行搶奪情願寫書求色喀庫勒部落之比綽瑪克持書往喚來降以贖重罪等語但思燕起業已就擒其餘已無能爲惟慮鄂布拉三等窘迫時或肆行搶擄眾布嚕特等平日既不加防範

臨時又必須官兵追捕邊防究屬不靖且薩木薩克根株既未盡除不免又有結夥滋事等患不若將燕起等督送鄂布拉三等或並可乘便與薩木薩克一同來降亦未可定是以將燕起暫行監禁所有燕起鄂斯瑞書一封寄交明亮塔琦等並諭塔琦將此書與色提巴爾第閱看後令其出名照據再寫一封並前二封卽作塔琦等意同交色哩庫勒之比縡瑪克持往一面奏聞一面辦理以免遷延時日鄂布拉三見色提巴爾第之信自必深信不疑並著將辦理如何情形迅速具奏○福康安奏諸羅圍解賊入內山潛匿隨令海蘭察等沿山搜查賊遁入斗六門據守大兵進攻山徑雜出惟有探明路徑方可長驅直入至恆瑞前次不敢輕進者恐鹽水港海口有失所關匪細自克復鹿仔草後招集義民五十餘莊以清後路原擬勦撫兼施連營前進無如過於持重轉涉遲

延尙非有心畏葸又察攀龍在諸羅西門外禁營並無自諸羅殺出之事臣面加詢問據稱因係損失多兵賊圍仍不能解惟有據實陳明懇請革職但觀其人尙奮勉可否酌留海壇鎮總兵原任查諸羅被圍數月終未失陷者實山眾義民一心奮勇又略得餉銀接濟方能保守與昔日錫伯軍營被圍絕餉景象迥不相同柴大紀人本詭詐深染綠營習氣不可倚任是以仍使伊屯駐諸羅將來事竣入都自難逃 聖明洞鑒諭軍機大臣等本日福康安摺奏賊匪經官兵屢次殲戮窮蹙奔逃若由海道竄逸官兵乘船追捕轉不免稍需時日如果逃入內山該處俱係生番居住若番眾等畏其逼處竟將賊首擒獻固屬甚善卽或容其潛匿不肯獻出亦可乘官兵全勝之勢直入內山分兵搜捕卽將助逆生番一併効戮亦非難事福康安等務須迅速搜捕將賊首設法生擒勿

令久匿稽誅爲要又據奏恆瑞帶兵援應途中觀望各情節以恆瑞過於持重致涉遲延總由不諳機宜辦理不能得手所論甚公至蔡攀龍前此應援入城雖未能帶兵出城勦殺賊目但伊屢次與賊打仗奮勇出力業已加恩擢用提督其過尙可寬免至所遺失兵丁是否實係陣亡抑係逃散從賊之處必當嚴切查究若隨征兵丁不顧主將臨陣逃散此而不加以懲創將來何以用兵此內從賊之兵其罪更甚於從賊之民福康安於查辦時尤當嚴加區別從重辦理不可稍存姑息之見又諭據福康安奏稱查明柴大紀蔡攀龍各情節請將普吉保調任臺灣鎮總兵等語所奏固是但柴大紀究能保守嘉義數月閒屢經勦殺賊匪曾經加恩封爲伯爵賞戴雙眼花翎卽蔡攀龍亦因從前李侍堯稱其領兵攻解嘉義縣之圍曾經授爲提督賞給巴圖魯名號今當進兵之際

遽將伊二人更調殊覺不便著暫留令其駐守彈壓官兵並傳諭  
李侍堯俟擒渠魁後伊等任內果有卑陋情弊再行查明補參治  
罪至從前降旨大功告竣留察礮龍幫同常青辦理善後事宜今  
閩福康安所奏蔡攀龍既屬無能彼時著卽遣回普吉保尙屬幹  
練卽著留彼處隨同常青辦理善後事宜○己酉諭臺灣賊匪滋  
擾嘉義縣城時普吉保恆瑞先後帶兵前往援應俱未能奮勇殺  
散賊匪直抵縣城均難辭咎但普吉保由鹿仔港進兵收復笨港  
移駐元長莊並經屢次打仗殺賊尙能自知奮勉所有臺灣鎮總  
兵員缺卽著普吉保調補以觀後效其所遵汀州鎮總兵員缺著  
福康安於軍營出力副將各員內揀選一員奏明候朕簡放至恆  
瑞在鹽水港一味株守毫無寸進實屬無能難勝將軍之任著卽  
來京候旨至福州將軍員缺前曾有旨欲將鄒輝調補因見在保

甯已補授伊犁將軍李世傑仍調補四川總督該省地方緊要且  
毗連西藏統轄番夷俱有應辦事件李世傑係屬漢人且年已老  
恐辦理公務精神不能周到鄂輝在川有年於該處事宜較爲熟  
諳將來臺灣事竣後應令仍回成都將軍原任以資駕輕就熟至  
常青勦捕臺灣逆匪雖未能督率將弁剋期奏績但自駐守郡城  
以來賊匪屢經攻擾伊已年老尙能臨陣殺賊將郡城保護無虞  
並節次派撥弁兵援應嘉義調度尙屬有方雖不宜復任總督但  
伊從前曾任福州將軍熟悉該處情形且以閩浙總督調補該處  
將軍員缺卽著常青補授將來大功告成後卽留於臺灣帶同普  
吉保辦理善後事宜其湖廣總督員缺卽著舒常補授所有工部  
尚書員缺著福長安補授○諭軍機大臣等孫士毅自辦理調兵  
運餉諸務以來俱能不分畛域實心辦理甚屬可嘉俟大功告竣

後賞給世職著先賞戴雙眼花翎以示優眷至昨據福康安奏柴  
大紀蔡攀龍守城打仗情形多不確實一節朕因此事反復思之  
竟至徹夜不能成寐向來綠營將弁冒功謊報積習原所不免但  
以天下之大地方事務在在需人任使遇有軍務勢不能止仗滿  
洲官兵竟置綠營於不用此次臺灣逆匪滋事以來該處領兵將  
弁雖未能俱振作有爲然就見在將領而論柴大紀蔡攀龍二人  
尙能奮勇出力柴大紀駐守縣城已經半載經賊百計攻圍時時  
窺伺柴大紀督率兵民力爲捍衛卒能保護無虞雖伊節次奏報  
斬獲首級奪取器械等事或聞有虛詞謊報此亦綠營積習情事  
所有但伊因守圍城不辭勞瘁亦當略其短而取其長柴大紀設  
果如福康安所云詭譎取巧則當縣城被圍緊急之時朕曾降旨  
諭令柴大紀如力不能支不妨帶兵出城另圖進取柴大紀何難

委城而出以爲脫身之計卽縣城爲賊所據百姓爲賊所得亦得  
薪口遵旨而行朕亦難治以棄城不守之罪乃柴大紀於奉到前  
旨後堅持定見竭力固守不忍將城內數萬生靈委之於賊是柴  
大紀尙知以國事爲重朕閱其奏摺爲之墮淚豈福康安目擊情  
形尙不心存憫惻轉事竒求不能以朕之心爲心乎卽如柴大紀  
前奏賊匪攻城時用大板木車中藏槍礮分路攻犯被官兵用礮  
擊碎枋車一節若果是虛詞見在福康安奏到進抵縣城追殺賊  
匪奪獲攻城大車二輛又於興化店地方賊匪經官兵追趕大礮  
鳥槍徧地遺棄俱爲我兵所得等語可見柴大紀前奏賊匪大車  
架轎攻城之處實有其事並非虛詞之一證又柴大紀所奏縣城  
糧食匱乏地瓜花生俱盡以油杌充食之語雖縣城被圍時義民  
等尙有捐助糧米零星接濟兵民未必遽至盡食油杌但當情形

緊急之時各路援兵並未卽時前進柴大紀目覩縣城糧食將盡至以日食油粍爲詞希冀援兵速到而普吉保恆瑞兩路尙復觀望不進若再實有糧米則兩路之救援更緩此時縣城之存亡尙未可知又安怪柴大紀之過甚其詞耶今幸福康安等統兵速進縣城圍解甫獲更生此等措語未實之處朕尙加之寬宥甯福康安不爲之原諒耶至蔡攀龍見據福康安到彼查詢於援應柴大紀時進城後仍被賊截斷後路損失多兵未能破賊解圍亦並無自城內殺出打通道路之事但蔡攀龍屢次打仗殺賊會經常青等保奏頗爲奮勇伊帶兵赴援時沿途遇賊接仗督兵力戰究能前抵縣城協同固守是蔡攀龍在領兵將弁中尙爲奮勉朕已加恩擢授提督福康安此時亦可無庸過加責備卽云臺灣逆匪等糾眾倡亂由於地方文武平日貪索擾累以致激成事端朕非不

知但該處百姓休養生聚有年即使地方官貪蹟斂怨亦可據質  
上控豈可公然叛逆况官吏騷擾地方剝削百姓自係文職爲多  
至武職所轄不過營伍兵丁並不經管地方事務縱使從中婪索  
然較之地方文職所得不過十之一二豈得以此歸咎柴大紀蔡  
攀龍二人此次破賊解圍官兵會合攻勦固屬福康安海蘭察督  
率巴圖魯侍衛章京等奮勇力戰之功該處綠營將弁俱屬怯懦  
無用但就該處帶兵之員而論其中勇怯不齊亦應絜長較短有  
所區別豈可一槩抹殺卽將來平定後焉有止留滿洲巴圖魯百  
餘人駐守將綠營將弁槩行撤回之理看來柴大紀蔡攀龍未免  
因俱係提督大員且屢經恩旨褒嘉或稍涉自滿在福康安前禮  
節或有不謹致爲福康安所憎遂爾直揭其短平況柴大紀蔡攀  
龍俱見任提督水陸將弁兵丁皆所統轄福康安卽有不滿伊二

人之處然其功夫不可泯亦應外示優容若遽加之聲色則所屬  
將弁兵丁見統轄大員全無顏面未免心存輕視竟主呼應不靈  
從而解體於事大有關係即使伊二人實有練習氣不可信任  
福康安何妨俟大功告成至京時密爲面奏亦不爲遲何必於此  
時遽以此形之奏願耶朕於柴大紀蔡攀龍二人並非先有成見  
不過念其守城打仗勤苦出力曲加軫念福康安非他人可比尤  
須仰體朕心略短取長方得公忠體國之道况柴大紀已加恩封  
以伯爵蔡攀龍業經超升提督福康安所奏各情形並無確據又  
豈可轉沒其功遽加以無名之罪耶總之柴大紀蔡攀龍功過自  
有定論福康安此時總以坦懷相待不稍露詞色爲是○庚戌諭  
韓鑄前任工部侍郎且曾任河道總督於工程事務較爲熟諳茲  
因服闋來京卽著補授工部右侍郎朱珪見出學差所有禮部右

侍郎員缺卽著劉躍雲署理○命福建督撫及水陸提督輪年赴臺灣稽查停止巡臺御史之例並嗣後臺灣道府缺出請旨簡放著爲令○丙辰諭斗六門爲南北要隘久經賊匪屯占福康安統領官兵將中大埔林尾大埔林各莊日日攻瀆乘勝直趨連夜前進剿殺賊匪將斗六門收復官兵奮勇力戰不避槍礮甚屬可嘉見據李侍堯奏聞官兵已破大里杙賊巢賊匪逃入內山生番等稟稱欲將逆首林爽文擒獲獻出等語想福康安等奏報之摺已在途卽日捷音可到俟大功告竣再行另降諭旨外福康安海蘭察恆瑞普吉保袁國璣著先行交部議敘至普爾普見已打通府城道路仍回北路協同進剿亦屬出力普爾普著交部議敘所有福康安等奏到格外出力之侍衛章京及鎮將官弁等除賞給巴圖魯名號及升等賞翎各員外其餘在事出力之侍衛章京鎮

將官弁等俱著查明一併咨部議敘○丁巳諭軍機大臣等恆瑞  
自駐禁鹽水港坐據多兵株守不進並未援應柴大紀轉以賊多  
兵少率請添調數萬大兵是其畏葸無能實無可解免是以屢經  
降旨嚴飭並將伊革去將軍令福康安查參具奏今聞福康安等  
奏到之摺不但不將伊參劾且摺內聲敘伊帶兵打仗之處頗似  
露其奮勉此時福康安等統領大兵乘銳深入豈少恆瑞一人且  
恆瑞若再不一同前進豈復尙有人心儻恆瑞果能奮勉則當福  
康安未到之先帶兵赴援何以並不見其鼓勇寸進今止係因人  
成事卽有斬獲亦何足爲功乃福康安於恆瑞頗留地步看來福  
康安於柴大紀等過事吹求而於恆瑞又不免因係親戚曲爲塘  
徇何以服眾心而示公正耶至臺灣見在勦捕事宜卽日告竣所  
有該處地方官平日廢弛擾累釀成事端之處亦應確切查辦卽

如永福在臺灣府協同防守雖有微勞但係道員在彼數年該管  
地方致有逆匪肆擾伊本不能辭咎其防守府城原屬伊分內之  
事且賊匪攻擾時有常青在府城督率兵民竭力堵勦永福不過  
隨同守禦伊身係滿洲於賊匪滋擾之時豈有不幫同常青禦賊  
而轉委城於賊之理卽云逆匪滋事由於府縣激成而府縣等皆  
係永福所屬平日何以漫無管束以致釀成巨案永福在臺灣道  
任內有無貪獘劣蹟著李侍堯確切查訪據實具奏不得姑息卽  
前被賊戕害各員如孫景燧董起埏劉亨基長庚湯大奎等雖俱  
爲賊所害但其平日居官實在有何貪獘不職劣蹟以致激變之  
處亦應仍將其款蹟逐加查究孫景燧等皆係永福屬員其在任  
劣蹟永福自無不知安有任其激成事端置之不問之理李侍堯  
當嚴加查訪據實參奏○大學士九卿奏酌議鄉會試科場條例

事宜一鄉會試二場向例分經中式查士子束髮授書原應五經全讀請於戊申科鄉試爲始先將五經輪流分試然後各出一題成五藝論題刪生員歲試俟五科後該學政亦輪流間出童生仍用四書文二經文刪一積匪窩藏槍手每與牆外巡綽兵役及關中號軍等句通作弊請交步軍統領會同順天府選派番役嚴密查拏一號舍外棘牆內巡更巷道地僻最易藏奸請用塘垣截斷禁止人役往來牆外官員巡察以資防範一關中號截應令知貢舉監臨督率提調監試等官將號截通行攬攬眼向外簾各員分手截印不得假手吏胥致滋買屬運號之弊一試卷例有空白以備臨期換給誠恐舉子賄屬書吏將印卷偷賣私行截用關會連號生彼此溷入號舍應將豫備空白停止一奸徒假充跟役指引舉子聯絡舞弊請嗣後稽察龍門大臣各按照品級攜帶跟役一

品四二品三三品二並給發腰牌以昭嚴密一舉子按牌聽點每有舞弊之徒希圖換卷彼此託故遲延以便同時補點請嗣後臨點不到者仍應隨時稟點違則扶出一鄉會謄錄向有賄屬謄寫工楷而未經賄託者試卷潦草竟至難於披閱請責成知貢舉監臨飭令謄錄所官嚴查並請嗣後墨卷自行點句句股對讀官詳加校正一試卷彌封向用千字文戳印紅號行之既久難保無內外簾豫先關會請嗣後將戳印攬亂庶彌封較爲慎重一墨卷添註塗改定例不得過百字但制藝字易數十庸劣即可改觀請於文尾詩末旁寫添註塗改若干字二三場如之違則貼出並請二場謄真後默寫頭場詩文聽試官臨時酌定填榜時比較取中一首場題紙限用夫蓋且夫今夫等字刻於四書每題下選用詩韻數十字刻詩題下其添註塗改及默寫首場亦即刻於每場題紙

後與題目同時給發一會試知貢舉鄉試監臨向係禮部漢侍郎及府尹輪充既可豫擬易滋吏胥揣摩之弊請嗣後該部將由科甲出身之滿漢侍郎及三品卿以上通行開列庶覲防益慎又議覆順天府府尹吳省欽奏請嚴俊秀貢監應試京闈之例查俊秀貢監較恩拔歲副等加捐者文理既遜錄送綦難近見該監錄科時散坐聚談竟或代倩完卷卽無不得入闈者請嗣後如由俊秀附生武生加捐者不論小京官與旗民卷俱應奏派大臣一該堂官一二秉公彙考御史會同編號嚴查至前三科中式北闈之蘇揚廣東山西俊秀應令禮部咨查原籍俟下科會試前十日齊集奏派親信大臣覆試批繆者罰科規避者永停考試等語查附生人數較多俱應一體從嚴請於七月二十九三十等日秉公彙考

三日內揭榜其前三科中試北闈者試以一藝一詩分別磨勘諭大學士九卿議奏科場條例嚴申功令豫絕弊源各款所議俱屬詳悉周妥已依議行矣但鄉會試二場改用五經請自戊申鄉試爲始用易經出題以後按照鄉會科分將五經依次輪試一周再於鄉會試二場五經並試一節極爲允當士子束髮授書原應五經全讀向來止就本經按額取中應試各生止知專治一經揣摩誦習而他經並不旁通博涉非敦崇實學之道今改用五經既可令士子潛心經學又可以杜絕場內關節弊端而衡文取中復不至限於經額致佳卷被遺自應於分年輪試畢後卽以五經出題並試惟所請明歲戊申鄉試先用易經出題之處周易理蘊深奧猝難通曉並恐邊省未必人人誦習明歲鄉試爲期較近若遽以易經命題考試其向非專經者或致不諳經旨難於取中因思士

子以詩經爲本經者多所有明歲戊申鄉試著先用詩經出題次年會試著用書經俟下次鄉試再用易經以後按照鄉會科分輪用禮記春秋庶士子得以漸次兼通講求精熟不至臨時草率應試又首場四書文向來限用夫蓋今夫且夫等字此等字樣主試者應於臨期酌量顛倒限令遵行毋庸按年排定卽三藝承題全用夫字或全用蓋字起講全用今夫或全用且夫俱無不可至設科取士原爲旁求俊乂掄拔眞材以備國家任使應試諸生由科甲出身者大而內居卿貳外任督撫小而翰詹科道分任羣職卽州縣等官亦無不有身膺民社之責該生等積學應試爲登進初階自當束身圭璧以端其本乃不安義命之徒往往希圖僥倖舞弊作弊愈出愈巧以致人言藉藉不得不大爲之防嚴申例禁竟至與穿窬宵小一律防閑覽大學士九卿所議各條朕深愧無德

化之感士子也此後應試諸生務須經明行修爭自濯磨以端實學而期仕進其膺衡文之任者亦應精白乃心秉公鑑拔以副朕作人雅化○戊午諭軍機大臣等德成自浙江差竣回京偶詢及柴大紀平日居官聲名如何據奏風聞柴大紀自復任臺灣總兵以後縱恣自大且居官貪黷較之地方文職尤甚並將臺灣所轄守兵私令渡回內地貿易牟利駐守之兵所存無幾上年逆匪林爽文等滋事不法其始不過會匪黨夥聽從附和人數無多因存城之兵無幾不能即時按捕賊匪糾眾肆擾距府城止三十餘里而柴大紀尙不思前往堵禦經永福催令出城始與打仗又因兵少敗衄以致賊匪益肆猖獗不可復制等語若如所奏是柴大紀在總兵任內貪縱不職亂法牟利於賊匪起事之初任意玩視使賊匪得以猖張蔓延日久竟由柴大紀貪縱廢弛釀激事變其平

日劣蹟已屬確有可據浙江既有風聞福建自更有議諭福康安  
到彼後於柴大紀種種劣蹟自必有所見聞卽應訪查明確將其  
實在款蹟據實參奏乃僅稱沾染綠營習氣狡詐難信而於柴大  
紀平日如何侵貪激變之處並未逐款指出止含糊具奏豈欲待  
朕自爲揣度耶試思柴大紀守城有功之人若止憑含糊無據之  
詞豈能將伊治以無名之罪今朕於召見德成無意中偶然詢及  
始悉此等情節而德成於朕詢問時初猶以柴大紀屢次邀恩懋  
賞未肯遽行陳奏經朕再四開導始一一具陳福康安受朕深恩  
非他人可比乃於柴大紀平日罪狀並未列款入告福康安豈德  
成之未若耶著傳旨嚴行申飭並將柴大紀實在款蹟詳悉查明  
卽詢之永福等果否實有前項覩法營私之處卽行據實參奏至  
李侍堯自調任閩省駐紮廈門於柴大紀平日居官聲名狼藉及

廢弛玩誤之處豈無屬員稟報來往傳聞乃李侍堯見柴大紀經朕屢加恩獎輒思容隱不言殊不知朕於臣下功罪從不肯絲毫假借卽如李侍堯從前歷任總督素能辦事受朕恩眷最優後因在雲貴陝甘任內兩次獲咎卽將伊按例治罪今於辦理臺灣事務頗能奮勉仍疊次加恩卽李侍堯所身受者而言已可共證今李侍堯於柴大紀有心暗顧徇隱實屬孤恩昧良心日大功告竣本欲給還原襲伯爵以示優獎今伊如此心存欺隱豈可再膺懋賞給還伯爵耶朕臨御以來勵精圖治五十二年如一日如福康安李侍堯此等存心行事若在朕九旬百齡之時妄思蒙混或可今清明在躬無遠弗矚卽歸政以前猶日孜孜不敢甯息豈肯於一切政事稍涉含糊卽諸臣中小有過失朕非不曲加寬假至於用人行政以及關繫地方吏治軍國之事則是非曲直從來覈實

辦理賞功罰罪權衡至當安能任臣下之顛預了事耶所有德成  
指出柴大紀各款及此外有何別項劣蹟並著福康安李侍堯各  
行嚴查密訪據實參奏毋得再有瞻徇致干重咎又諭前經降旨  
加封柴大紀伯爵並賞給銀一萬兩令琅玕於浙江庫內支銀五  
千兩發給伊家屬並諭令李侍堯於閩省藩庫內撥銀五千兩解  
送柴大紀處給予使用見在另降諭旨訪查柴大紀激變殃民之  
事所有前項銀兩未便徑行賞給著傳諭李侍堯琅玕接奉此旨  
將前項銀兩暫停給發另候旨辦理○己未諭軍機大臣等柴大  
紀前任臺灣總兵時廢弛營伍縱令兵丁渡海貿易是以有林爽  
文等跳梁滋事雅德在閩多年乃柴大紀如此悖謬豈竟毫無見  
聞竟屬喪盡天良著傳諭明亮接奉此旨卽將雅德鎖拏派委幹  
員妥爲照料解京治罪並著先訊大槩迅速奏聞雅德時在噶  
什噶爾辦事○

諭見在福康安已攻克斗六門並有攻破大里杙賊巢之信逆首  
林爽文定日即可就擒其南路賊匪聞北路官軍屢次克捷自必  
聞風膽落且經常青曉諭各莊民人如遇賊黨入莊卽行拏解並  
蹤迹莊大田藏匿處所共相擒獻給予重賞當此賊首潰竄之時  
其餘黨羽日就解散或其夥匪自謀生路竟將莊大田縛獻亦未  
可定且逆首林爽文之次卽係莊大田均爲渠魁首惡卽日福康  
安拏獲林爽文後斷無將莊大田竟置不辨之理自應乘屢勝兵  
威於北路賊匪援剿淨盡之後前往南路與常青會合一處併力  
勦捕務將賊目莊大田及黨夥各要犯悉數拏獲方可謂之減事  
其洋面一帶仍著常青嚴飭將弁實力巡緝截其逃竄之路勿令  
賊人得以奔竄入海本日令軍機大臣提訊任承恩據供曾聞柴  
大紀操守平常聲名狼藉並不管束兵丁任其游蕩上年十一月

柴大紀巡閱各營本應由彰化至淡水等處查閱因聞林爽文滋  
事並不前往查辦轉回至府城後來林爽文攻擾府城時聞柴大  
紀尙在城內經永福催令打仗始帶兵出城在城外十餘里地方  
駐紮等語與昨日德成所奏大略相同似無虛假柴大紀種種劣  
蹟德成在浙江尙有風聞而任承恩於四十九年到提督任時亦  
已聞其聲名狼藉廢弛營伍可見人言藉藉已非一日乃福康安  
李侍堯含糊徇隱卽治罪亦所應得今經朕嚴行訓飭福康安李  
侍堯務將德成指出柴大紀各款及任承恩所供各情節並此外  
尙有何劣蹟一併據實查參候朕裁酌○庚申官兵攻克水沙連  
大里林等處授阿穆勒塔爲一等侍衛賞張芝元總兵銜袁國瑣  
等巴圖魯名號餘升賞有差○諭軍機大臣等生番頑獘性成貪  
利而無信福康安當大兵攻克賊巢聲勢百倍逆首窮竄之際正

當趁此兵威及鋒而用卽勒兵直壓生番地界諭以禍福則生番等震懾兵威貪得獎賞自必將林爽文卽時獻出實爲此事緊要機宜從來用兵之道惟以威勝厯觀前史禦賊之道無不全資兵力卽至講和修好納降亦必陳師壓壘使敵人懾懼畏伏然後盟約可堅操縱自我今止差人曉諭生番懸立重賞則生番等惟利是視設林爽文窮竄該處將所掠財帛廣爲賄結較懸賞之數更多生番更利其重賄或竟將林爽文私行藏匿不肯擒獻福康安豈將委之不辦且見據福康安所奏招集社番止有屋鷺等十六社其水沙連二十四社外尙有無數社番若皆購綏往招設生番等私將林爽文放逸而以逃往他社藉口此數十番社中互相推卸旣不能不予以重賞又仍不能藉生番之力擒獲賊首有何裨益豈有官兵在彼久駐經年累歲候其篤獻之理且似此展轉稽

延儒林爽文暗中勾結復從內山潛行煽惑別滋事端豈不更費兵力生番等受其賄賂捏稱已死亦將信其誑詐遽爲完事乎前曾有旨諭令福康安等於勦捕完竣將善後事宜交常青等接辦福康安海蘭察等明春趕赴天津加以宴賞今首逆林爽文尙在潛匿搜捕不免多需時日計明年巡幸天津時福康安等斷不能趕赴行在竟無庸遵照前旨急於前來如將逆首林爽文拏獲卽令海蘭察先行押帶進京福康安於擒獲賊首廓清北路後仍當統領官兵馳赴南路會合常青將賊目莊大田及黨夥各要犯悉數擒拏埽除餘孽收復鳳山將一切善後事宜酌定章程再行起程回京亦未爲遲至柴大紀如止係小有侵漁私圖肥棗此等劣蹟臺灣文武官吏皆所不免朕於他人尙不加深究況柴大紀係有功之人今柴大紀屢弛營伍甚至私令兵丁渡回內地貿易卒

利以致存營兵少而於賊匪起事之初柴大紀正值巡閱各營並不卽時前往查辦轉回至府城及賊匪距城三十餘里尙不思帶兵出城勦捕此三事是柴大紀最重之案是賊匪日漸猖獗蔓延擾竟由柴大紀驥成則雖有守城之功而其激變之罪斷難輕貸將伊按例正法亦所應得卽將來覈辦時念其不肯出城一節尙堪憐憫亦止可如黃仕簡任承恩寬其一死而於朝審勾到時仍應鄉赴市曹以示微儆斷不能置之不辦顧預了事福康安李侍堯如查明柴大紀款蹟屬實卽嚴行參奏拏問治罪○諭徐嗣曾本係漢員由科甲出身朕因其辦理地方事務尙能循分妥協是以擢用巡撫朕平日信任委用原非若福康安李侍堯可比但以柴大紀如此款蹟昭然在浙江旣有聲聞福建自更有物議徐嗣曾豆臺無聞見著該撫卽將柴大紀各款蹟詳晰查明確實並

此外有無別項劣蹟一併據實參奏該撫已往之咎朕已不加深究今經特旨詢問若再有徇隱之處則是自取罪戾恐不能再邀曲貸○諭柴大紀種種款蹟德成自浙江回京傳問旣有確據琅玕身膺巡撫於柴大紀卿評與論豈竟毫無風聞且該巡撫身係覺羅尤非他人可比閩浙本屬毗連聲息相通一有外邊議論卽當據實奏聞方爲不負任使何以竟未奏及著琅玕將因何不奏之處明白回奏○是歲朝鮮來貢○會計天下民穀數各省通共大小男婦二萬九千二百四十二萬九千一十八名口各省通共存倉米穀三千七百五十五萬六千九百七十八石五斗四升五合